

समे – 12:25

<><><><><><>

PM-US Visit

अमरीका च बसे दे भारतीयें गी राष्ट्रदूत आखदे होई प्रधानमंत्री नरेन्द्र मोदी होरें गलाया जे ओह सदा थमां मुखै दे सशक्त ब्रांड अम्बैस्डर रेह न। प्रधानमंत्री होरें कल रातीं न्यूयार्क ते लॉग आईलैंड च आयोजित भारती समुदाय दे किट्ठ गी संबोधत करदे होई इआं आखेआ। भारत ते अमरीका दे दपक्खी सरबंधें गी तगड़ा करने च उंदी भूमका गी सरांहदे होई श्री मोदी होरें आखेआ पूरी दुनिया आस्तै एआई दा मतलब आर्टिकफशल इंटैलीजेंस ऐ पर उंदा मन्नना ऐ जे एआई भारती-अमरीकी जज्बे दा प्रतिनिधित्व बी करदी ऐ। प्रधानमंत्री होरें अमरीकी राष्ट्रपति जो बाइडेन हुंदे आस्सेआ उनें'गी अपने घर सदने पर उंदा धन्नबाद करदे होई आखेआ जे एह 140 करोड़ भारतीयें लेई मानै आहली गल्ल ऐ। मोदी होरें घोशणा कीती जे बोस्टन ते लॉस एंजेलिस च द'ऊं नमें भारती कॉन्स्यूलेट खोले जांगन। एहदे'नै बांदे होना ऐ जे भारत नै पूरे अमरीका च बस्सने आले भारतीयें कन्नै तगड़े सरबंध कायम करने दा धेइया कीते दा ऐ। प्रधानमंत्री होरें ह्यूस्टन युनिवर्सिटी च थिरुवल्लूवर चेयर ऑफ तमिल स्टडीज़ शुरू करने दी बी घोशणा कीती। इस मौके पर प्रधानमंत्री होरें भारत गी विकसित मुख बनाने लेई पुष्प मंत्र बी दिता। उनें आखेआ जे एह 5 थम्म रलियै विकसित भारत दा निर्माण करडन। श्री मोदी होरें दस्सेआ "पी" दा मकसद प्रोग्रेसिव भारत यानि विकास दी बता अगड़ा बधने आला भारत "यू" दा मतलब अनस्टापेबल भारत यानि अग्गे बधदे भारत गी कोई नेई रोकी सकदा। "एस" दा मतलब सपीरिच्यूल भारत यानि आध्यात्मिक भारत, "एच" यानि ह्यूमैनिटी फर्स्ट भारत- मनुक्खता गी सब्बने शा पैहले रक्खदा ऐ ते 'पी' दा मतलब प्रॉसपरस यानि खुशहाल, समृद्ध भारत।

<><><><><><>

PM-Bilateral Talks

प्रधानमंत्री नरेन्द्र मोदी हों संयुक्त राष्ट्र महासभा दे बाहें कुवैत दे युवराज शेख सबा अल-खालिद अल-सबा हुंदे'नै न्यायार्क च अज्ज बड्डलै मुंह न्हैरे दपक्खी बैठक लाई। दौने नेताएं दपक्खी सरबंधें दा जायजा लैता ते ऐतिहासिक सरबंधें ते दौने मुखें दे लोकें बशकार सरबंधें गी तगड़ा बनाने दे तौर-तरीकें पर बी चर्चा कीती। प्रधानमंत्री हों नेपाल दे अपने हमरूतबा के.पी. शर्मा ओली हुंदे'नै बी मलाटी लाई। दौने मुखें दपक्खी हितें दे मामलें पर चर्चा कीती। प्रधानमंत्री मोदी हों मुख कार्जकारी अधिकारिणं दी गोलमेज वार्ता च कारोबारी लीडरें कन्ने नमी उभरदी तकनीकें दे खेतर च साथ-सैहयोग बारें बी गल्लबात कीती।

<><><><><><>

2nd/3rd phase campaign

जम्मू कश्मीर विधानसभा चुनां दे बाकी रौहदे दऊं गेडें तैहत औंदी 25 सितम्बर ते फही पैहली अक्तूबर गी होने आहले चुनां लेई प्रचार अभियान होर तेज होई गेआ ऐ। बक्ख-बक्ख सियासी पार्टिणं दे बड्डे बड्डे लीडर ते स्टार प्रचारक चुनां रैलियां करियै मते शा मते मतदाताएं गी अपने पक्खे च करने लेई पूरी टिल्ल लाऽ करदे न ते आए दिन चुनां रैलियां, रोड शो ते लोकें कन्ने मिलियै गल्लबात आले गेड़ लगगा करदे न। तोआई जम्मू कश्मीर च दुए गेड़ दे असैम्बली चुनां लेई प्रचार अज्ज संजा मुक्की जाहग। इस गेड़ तैहत केन्द्र शासत प्रदेश दे 5 जिलें च फैली दिणं कुल 26 विधानसभा सीटें लेई अतरुं बुधवारें 25 सितम्बर गी वोट पोआए जाडन। इनें जिले च जम्मू संभाग दे रियासी, राजौरी ते पुंछ जिलें सने कश्मीर घाटी दे बडगाम ते श्रीनगर जिले बी शामिल न। जम्मू कश्मीर विधानसभा दे चुनां कुल त्र'ऊं गेड़ें च करोआए जा'रदे न। वोटें दी गिनतरी 8 अक्तूबर गी कीती जाहग।

<><><><><><>

Rajnath JK Democracy

रक्षा मंत्री राजनाथ सिंह, जेहड़े इनें दिनें जम्मू च बीजेपी दे मेदवारें लेई चुनां प्रचार करा करदे न, होरें पैहले गेड़ दे चुनां तैहत जंदी 18 सितम्बर गी बधी-चढ़ियै मतदान करने लेई जम्मू कश्मीर दे लोकें दी सराहना कीती। उनें आखेआ जे दफा 370 हटने दे बाद जम्मू कश्मीर च लोकतंत्र दियां जड़ां होर मजबूत होइयां न ते एह तेजिया कन्नै फुल्ले-फले करदा ऐ ते एह सब किश दिक्खियै साढ़े गोआंडी मुख्य पाकिस्तान गी टिड्डै च पीड़ होआ करदी ऐ। उनें दोश लाया जे नैशनल कांफ्रेंस, कांग्रेस ते पीडीपी अपने घोशणा पत्रें च दफा 370 गी परतियै ब्हाल करने बारे गल्ल करियै जम्मू कश्मीर दे लोकें गी गुमराह करा करदे न। उनें आखेआ जे इनें पार्टिएं गी पाकिस्तान दी बोली बोलना बंद करना लोइचदा। बीजेपी नेता होरे अग्गे आखेआ जेगर जम्मू कश्मीर च उंदी सरकार बनदी ऐ तां जम्मू कश्मीर गी देसै दा सब्बनें शा विकसित इलाका बनाया जाहग।

<><><><><><>

Rahul Poll Rallies

लोकसभा च बरोधी धड़ें दे नेता ते कांग्रेस पार्टी दे साबका प्रधान राहुल गांधी होर अज्ज पुंछ जिले दे सुरनकोट कस्बे ते श्रीनगर च जनसभां करै करदे न। हासल जानकारी मुजब गांधी होर पैहले सुरनकोट च कांग्रेस ते नेशनल कांफ्रेंस दे सांझे मेदवार शानवाज़ चौधरी हुंदे हक्कै च इक जनसभा करै करदे न ते एहदे परेंत ओह श्रीनगर शैहा दे सेंट्रल शॉलटिंग च प्रदेश कांग्रेस दे प्रधान तारिक हमीद कर्रा हुंदे हक्कै च इक होर रैली गी संबोधत करडन। एहदे परेंत संजा'लै ओह दिल्ली परतोई जाडन। एहदे शा पैहले राहुल होर बनिहाल हल्के दे संगलदान ते अनंतनाग दी डुरू थाह दऊं रैलियां करी चुके दे न।

<><><><><><>

PM Jammu Rally

प्रधानमंत्री नरेन्द्र मोदी होर औंदी 29 सितम्बर गी जम्मू च इक चुनावी रैली गी संबोधत करडन। एह सांझी रैली बीजेपी दे जम्मू सांबा ते कठुआ जिले दे 20 मेदवारें दे हक्कें च होग जेहड़े जम्मू कश्मीर विधानसभा चुनां दे त्रीए ते अखीरले गेड़ च होने आले चुनां लेई मदान च न। जम्मू-कश्मीर च चुनावें दे सिलसिले च मोदी हुंदी एह चौथी रैली होग। एहदे शा पैहले ओह डोडा, श्रीनगर ते कटड़ा च चुनावी रैलियें गी संबोधत करी चुके दे न।

<><><><><><><><>

Hari Singh Birthday

पैहलकी जम्मू कश्मीर रिआसत दे खीरी डोगरा हुक्मरान सुरगवासी महाराजा हरि सिंह हुंदी अज्ज 130मीं जयंति मनाई जा'रदी ऐ। इस सरबंधै च युवा राजपूत सभा नै गीत-संगीत आले इक बड्डे कार्यक्रम दा आयोजन कीता ते तवी पुलै कश महाराजा हरि सिंह हुंदी प्रतिमा आली थाह डोगरा कलाकारें गी सम्मानत कीता। एह जशन अज्ज पूरा दिन चलोग कीजे ब'रे 2022 थमां गै इस ध्याड़े पर छुट्टी दा ऐलान करी दिता गेदा ऐ। महाराजा हुंदा जरम 23 सितम्बर सन 1895 गी अमर सिंह हुंदे घर होआ हा। 1947 च भारत दी आजादी दे बाद जिसलै पाकिस्तानी बलें ते कबाइलियें पास्सेआ रिआसत पर हमला कीता गेआ तां महाराजा होरें रिआसत दा विलय भारत कन्नै करियै पाकिस्तानी बलें खलाफ भारती बलें दी मदाद लैती ही। हरि सिंह होर 1952 तगर इत्थु दे महाराजा रेह। सिंह होरें अपने खीरी दिन बॉम्बे च गुजारे ते उंदा काल 26 अप्रैल 1961 गी होआ। महाराजा हरि सिंह होर दऊं रेडियो स्टेशनें दे संस्थापक बी रेह जिंदे च पैहली दिसम्बर 1947 गी जम्मू ते पैहली जुलाई 1948 गी श्रीनगर रेडियो स्टेशन शामिल न। रेडियो कश्मीर जम्मू जिसी अज्ज आकाशवाणी जम्मू आखेआ जंदा ऐ, पर महाराजा हरि सिंह होरें पैहले औपचारिक भाशणै च लोकें गी पाकिस्तानी घुपैठियें खलाफ इकजुट रौहने लेई आखेआ हा। तोआई लेफ्टिनेंट गवर्नर मनोज सिंह होरें महाराजा हरि सिंह हुंदी जयंति पर उनें'गी श्रद्धांजलि अर्पित कीती ऐ। सोशल मीडियो दी इक पोस्ट राणें एलजी होरें आखेआ जे लोकें

दी भलाई-बेहतरी लेई बरोबरी पर आधारित समाज दे निर्माण लेई महाराजा हुंदी वचनबद्धता बेजोड़ ही। उनें आखेआ जे उंदे बचार सदा स्हाड़ा मार्गदर्शन करदे रौंहगन।

<><><><><><>